



Neno la Msalaba

Somo la Juma Hili:

1 Kor. 1:17–31, Kol. 1:20, 1 Pet. 2:24, Mdo. 13:16–47, 1 Kor. 2:1–5.

FUNGU LA KUKARIRI:

“Kwa sababu neno la msalaba kwao wanaopotea ni upuzi, bali kwetu sisi tunaookolewa ni nguvu ya Mungu” (1 Wakorintho 1:18).

Cicero, mwandishi na msomi Mrumi mpagani, aliwaambia Warumi kuondoa wazo la msalaba, kama njia ya adhabu, katika akili zao. Ingawa Cicero alikufa karibu nusu karne kabla ya Yesu kuzaliwa, maneno yake yanaelezea dharau ambayo kwayo Warumi waliuchukulia msalaba. Lilikuwa baya sana kiasi kwamba hawakupaswa hata kulifikiria.

Kinyume chake, Paulo angeandika: “Neno la msalaba . . . ni uweza wa Mungu” (1 Kor. 1:18). Kwa Paulo, Msalaba ni chombo cha upatanisho kati ya Mungu na mwanadamu (Efe. 2:16, Kol. 1:20), ishara kuu ya unyenyekevu wa Yesu (Flp. 2:8) na mahali ambapo deni letu kubwa lilipolipwa (Kol. 2:14).

Msalaba ni jibu la Paulo kwa matatizo huko Korintho. Huhitaji kwenda mbali sana katika 1 Wakorintho ili kutambua kwamba anajishughulisha sana na suala moja kuu: migawanyiko katika kanisa. Paulo anafadhaishwa sana kiasi kwamba mara tu baada ya salamu (1 Kor. 1:1–3) na sehemu ya shukrani (1 Kor. 1:4–9), hii ndiyo mada ya kwanza anayozungumzia (1 Kor. 1:10–17). Juma hili, tutageukia ujumbe wenye nguvu wa Msalaba kama jibu la tatizo hili na masuala mengine huko Korintho.

***Jifunze somo la juma hili kwa maandalizi ya Sabato ya Julai 11.**

Injili ya Msalaba

Paulo anasema kwamba neno la Msalaba ni nguvu ya Mungu kwetu. Haishangazi kwamba “Yesu Kristo naye amesulibiwa” ndiye kiini cha kuhubiri kwake (1 Kor. 2:2).

SOMA

1 Wakorintho 1:17–31. Ni hoja gani muhimu ambayo Paulo anaitoa hapa?

Katika 1 Wakorintho 1:18–31, Paulo anashughulikia tofauti kati ya upumbavu wa kibinadamu na hekima ya kiungu. Msalaba una uwezo wa kuonesha ubaya uliokithiri wa mwanadamu na wema mkamilifu wa Mungu. Sehemu hii ya 1 Wakorintho inaanza kwa maelezo katika 1 Wakorintho 1:17. Kwa sababu Msalaba wa Kristo hautakiwi kuondolewa nguvu zake (1 Kor. 1:17), ujumbe wa Msalaba unapaswa kuwa kiini cha kuhubiri kwetu (tazama pia 1 Kor. 2:2).

Paulo anasema kwamba hakutumwa kubatiza, bali kuhubiri Injili ya Msalaba. Kauli hii inahitaji uchunguzi wa aina mbili muhimu. Kwanza, kitenzi cha Kiyunani kilichotafsiriwa kama “kutuma” ni apostello, kinachotokana na mzizi uleule kama neno mtume. Hivyo, kazi ya msingi ya kiutumbe ya Paulo ilikuwa ni kutangaza injili. Pili, maneno ya Paulo kuhusu ubatizo hayakumaanisha kwamba ubatizo haukuwa muhimu au angalau si muhimu kama kuhubiri. Badala yake, alikuwa anawakemea wale waliowakuza wale waolikuwa wanafanya kazi ya kubatiza tofauti na Yesu, ambaye katika Yeye wamebatizwa.

Kwa “hekima ya maneno” (1 Kor. 1:17), Paulo hamaanishi kwamba hotuba zinazotolewa kwa umbuji ni mbaya kwa zenyewe. Hoja ni kwamba hekima ya kibinadamu isizuie ujumbe wa Msalaba kueleweka. Kirai hiki kinarejelea balagha (swali lisilohitaji jibu) ya Kiyunani na Kirumi. Huko Athene, Paulo alitumia mantiki, sayansi na falsafa, lakini hilo lilitokeza matokeo kidogo. Kwa hiyo, “aliambia kufuata utaratibu mwingine wa kazi huko Korintho ili aweze kuvuta usikivu wa watu wasiojali na kuupenda ukweli. Alikuwa amekamia kujiepusha na hoja na mijadala yenye kuelezea mambo kwa undani, “Maana naliazimu nisijue neno lo lote kwenu,” kati ya Wakorintho “ila Yesu Kristo, naye amesulubiwa.” Na alikuwa awahubiri “siyo kwa maneno ya hekima yenye kushawishi akili za watu, bali kwa dalili za Roho na za nguvu.” —Ellen G. White, *Matendo ya Mitume*, sehemu ya kwanza, uk. 211.

Ni kwa njia zipi hotuba zilizofafanuliwa kwa undani zinaweza kufanya ujumbe wa Msalaba usieleweke vizuri? Kwa nini kumtangaza Yesu Kristo aliye sulubiwa kulizaa matunda mengi zaidi huko Korintho kuliko mantiki, sayansi, na falsafa vilivyofanya huko Athene? Hata hivyo, je, kunaaweza kuwa na nyakati ambapo mantiki, falsafa, na sayansi vinaweza kuwa msaada katika kutangaza injili?

Kwao Wanaopotea ni Upuuzi

Katika kutofautisha upumbavu wa mwanadamu na hekima ya kiungu, Paulo anasema kwamba “neni la msalaba kwao wanaopotea ni upuuzi” (1 Kor. 1:18). Rejeo hili ni la kwanza kati ya marejeo sita ya upuuzi au upumbavu katika 1 Wakorintho 1:18–31.

SOMA

1 Wakorintho 1:20, 21, 23, 25, na 27. Rejea hizi za upuuzi zinatusaidiaje kuelewa kile Paulo alichomaanisha aliposema kwamba neno la Msalaba ni upuuzi kwa wale wanaopotea?

Neno la Kiyunani linalotafsiriwa upuuzi katika 1 Wakorintho 1:18 ni *mōria*. Neno hili linatokea mara tano tu katika Agano Jipya na zote ni katika 1 Wakorintho (1 Kor. 1:18, 21, 23; 1 Kor. 2:14; 1 Kor. 3:19). Neno hili na mengine yanayotoka katika kundi moja yanatokea mara nyingi katika Agano Jipya, na nusu ya hayo yako katika nyaraka za Paulo. Matukio mengi ya Agano Jipya ya kundi la neno hili yanapatikana katika 1 Wakorintho.

Upuuzi anauzungumzia Paulo katika 1 Wakorintho 1:18, 23 hauhusiani sana na ukosefu wa akili kama ilivyo kwa tabia na mawazo potovu, kukosa utambuzi na hata uasi dhidi ya Mungu. Hili linaeleza kwa nini alizungumzia sana mada hii katika 1 Wakorintho.

Fikiria hali ya Paulo katika mji huu. Anafika mahali palipojivunia kile kinachoitwa maarifa na hekima na ustaarabu wa kitamaduni. Katika muktadha huu, anamzungumzia Myahudi wa Galilaya, Yesu wa Nazareti, aliyekuwa amesulubiwa na Warumi, na kisha kufufuka kutoka ufuni—ili kulipia sio tu dhambi za bali dhambi za ulimwengu. Huyu mtu anaweza kuwa anamaanisha kweli? Alikuwa anamtania nani? Hii haikuwa dhana mpya ya kina ya kifalsafa, pia, ambayo ingeweza kuchanganuliwa na kuchambuliwa kwa zana za kifalsafa; ilionekana kuwa kama wazimu, upuuzi, kitu ambacho hakuna Mkorintho yeyote mwenye akili na elimu ambaye angeweza kuchukulia kwa uzito.

Na, japo ujumbe wa Paulo ulionekana kuwa upuuzi kwa wapagani, kwa Wayahudi wengi ujumbe wa Msalaba ulionekana vibaya zaidi. Ni Myahudi gani aliyekuwa anatarajia Masihi auawe na Rumi? Masihi alitakiwa kuwapindua Warumi, si kusulubiwa nao.

Hivyo, tangu mwanzo, Paulo alikuwa anapambana na mambo mengi huko Korintho. Hata hivyo, licha ya haya yote, roho—Wayahudi na Wamataifa—waliongolewa katika injili.

Kuna ujumbe gani hapa? Upinzani wowote tunaokabiliana nao, Mungu ana watu ambao wako tayari kuisikia kweli. Tunapaswa tuwe tayari kutumiwa Naye ili kuwafikia watu hawa popote walipo, hata maeneo ambayo leo ni mabaya kama yale au hata mabaya zaidi kuliko mji wa Korintho ulivyokuwa.

Nguvu kwa Wale Wanaookolewa

Ujumbe wa 1 Wakorintho 1:18 uko wazi sana kwa mtu kukosa uhakika. Kile Msalaba unachomaanisha kinategemea jinsi mtu anavyoutazama. Ni upuuzi kwa wale wanaomwasi Mungu, lakini ni nguvu kwa wale wanaoutamani wokovu Wake.

SOMA

Wakolosai 1:20 na 1 Petro 2:24. Yesu alitimiza nini kwa ajili yetu pale msalabani?

Kama tulivyokwisha kuona, katika kuhubiri injili, mtu anapaswa kuepuka “hekima ya maneno, msalaba wa Kristo usije ukabatilika” (1 Kor. 1:17). Kwa kuzingatia 1 Wakorintho 1:17, inakuwa rahisi kuelewa kwa nini kinyume cha upuzi ni nguvu ya Mungu na si hekima ya mwanadamu (1 Kor. 1:18). Msalaba, ambao ni kinyume kabisa na hekima ya mwanadamu, unafunua jinsi hekima ya mwanadamu ilivyo upuuzi.

Kifungu cha Kiyunani cha 1 Wakorintho 1:18 kinamaanisha kwamba “wanaopotea” wanapokea matokeo ya matendo yao. Aya inaweza kusomeka hivi: “Kwa sababu neno la msalaba ni upuzi kwao wanaojiangamiza wenyewe.” Kitenzi cha Kiyunani apollymi “kuangamia” kinaweza pia kumaanisha “kuharibu” (Yn. 10:10). Kwa kweli, apollymi inatafsiriwa kama “haribu” katika 1 Wakorintho 1:19.

Nini kinatokea hapa? Paulo anatoa msingi wa kibiblia wa kauli hii katika aya ya 18, kuhusu watu hawa kuangamia, kwa kunukuu katika aya ya 19 maneno ya Mungu katika Isaya 29:14. Katika aya ya 19, Mungu ndiye yuko nyuma ya kuharibiwa huko, kunakoonekana kukinzana na kiburi cha kujiangamiza kilichotajwa hapo kabla. Hata hivyo, hakuna ukinzani. Wazo ni kwamba Mungu ataharibu kile ambacho tayari kinajiangamiza chenyewe tangu mwanzo.

Tofauti na wale wanaoangamizwa, kirai “kwetu sisi tunaookolewa” (1 Kor. 1:18) kinaonesha kwamba wokovu unatoka kwa Mungu pekee. Paulo anasema kwamba tunaookolewa; yaani, hatujiokoi. Bila shaka, sisi, hatuwezi. Wokovu wetu unatoka nje yetu. Wakati uangamivu unasababishwa na mtu mwenyewe, wokovu unaweza tu kutolewa, zawadi ya neema kwa wenye dhambi. Kama ilivyo dhahiri katika 1 Wakorintho 1:21, ni Mungu ndiye anawaokoa wale wanaoamini. Upuuzi, kwa maana hii, ni kitendo cha kukataa kile ambacho Mungu amewapa wanadamu kwa njia ya msalaba wa Kristo (1 Kor. 1:30), hivyo kujiletea uharibifu.

“Kwa maana mshahara wa dhambi ni mauti, bali karama ya Mungu ni uzima wa milele katika Kristo Yesu Bwana wetu” (Rum. 6:23). Ni kwa njia zipi aya hii inarudia kile Paulo alichokuwa anasema katika 1 Wakorintho 1:18, 19?

Masihi Aliyesulubiwa

Paulo aliandika kwamba “Wayahudi wanataka ishāra, na Wayunani wanatafuta hekima” (1 Kor. 1:22). Msalaba—wazo la Mungu, Masihi, kusulubishwa—haukuwa ishara ambayo Wayahudi waliitarajia. Wala haukuwa aina ya hekima ambayo Wayunani waliitaka. Ilikuwa kinyume na matarajio ya kila mtu.

Kwa hakika, mtu anachopaswa kufanya ni kusoma jinsi wanafunzi walivyoitikia wazo la Yesu kusulubiwa (*tazama Mk. 8:31, 32; Mk. 9:30–32; na Mk. 10:32–34*) ili kuanza kuona jinsi wazo zima lilivyokuwa geni na baya, hasa kwa Wayahudi. Kama ilivyosemwa hapo kabla, Wayahudi walitarajia Masihi awashinde Warumi; hilo si lililotokea, angalau si katika maana ya kijeshi ya kidunia ya “kushinda.”

Kwa karne nyingi, Msalaba umekuwa, kwa Wakristo, ishara ya imani. Ni vigumu kwa Wakristo wa karne ya ishirini na moja kuelewa jinsi wazo la Mungu aliyesulubiwa lilivyokuwa la kijinga kwa mtazamo wa karne ya kwanza.

Hata hivyo, ni kwa sababu huu ulikuwa ujumbe wa kushtua sana unaoufanya ustahili tafakari yetu ya kina. Taswira ya Masihi aliyesulubiwa inadhihirisha wazi kabisa kwa ulimwengu mzima jinsi Mungu alivyokuwa tayari kwenda kukamilisha mpango wa ukombozi. Wazo la msalaba wenyewe na la kufa kwa Bwana msalabani, linashangaza vya kutosha kwetu sisi, wenye dhambi hapa duniani. (Hata hivyo, hebu fikiria ingemaanisha nini kwa viumbe wasio na dhambi waliomjua na kumwabudu Bwana Yesu mbingu

SOMA

Mdo. 13:16–47 (hasa aya ya 26, 38 na 47). Kifungu hiki kinatufundisha nini kuhusu maana ya Msalaba?

Paulo anasema Kristo alimtuma kuhubiri injili. Hivyo Paulo anahubiri ujumbe wa Masihi aliyesulubiwa (1 Kor. 1:23). Anarudia tena mawazo haya katika 1 Wakorintho 2:1–5. Mtume alikuwa mwaminifu kwa agizo la Kristo. Katika kuitangaza injili, hakutumia “ufasaha wa maneno wala hekima” (1 Kor. 2:1); badala yake, alijikita tu kwa “Yesu Kristo naye amesulubiwa” (1 Kor. 2:2). Hotuba na ujumbe wake “hakukuwa kwa maneno ya hekima yenye kushawishi akili za watu, bali kwa dalili za Roho na za nguvu” (1 Kor. 2:4) kwa sababu, kwa kweli, “hekima ya wanadamu” ina tofauti iliyo dhahiri na “nguvu za Mungu” (2 Kor. 2:5).

Masihi aliyesulubiwa ni kitu ambacho hakikutarajiwa kabisa na Wayahudi na Wayunani. Hili linatuambia nini kuhusu ukweli kwamba Mungu huwa hatendi kwa namna tunavyotarajia? Kwa nini hii ni dhana muhimu kufahamu, hasa wakati mambo yanapokuwa hayaendi jinsi tulivyotarajia?

Kristo, Nguvu na Hekima ya Mungu

Katika 1 Wakorintho 1:19, 20, 30 na 31, Paulo anazungumzia jinsi hekima ya Mungu na hekima ya mwanadamu zinavyotofautiana sana hivyo, haziwezi kuwa sawa. Ona kwamba Paulo hakatai hekima kama hiyo, bali anakataa aina ya hekima ya kibinadamu inayojaribu kushindana na Mungu. Hekima ya mwanadamu haina uwezo wa kuwaweka huru watu kutoka dhambini. Kristo pekee, hekima ya Mungu, ndiye anaweza kufanya kazi hii. Tazama jedwali hapa chini.

Bali kwetu sisi tunaokolewa	[ujumbe wa msalaba] ni nguvu ya Mungu	1 Kor. 1:18
Bali kwao waitwao	Kristo [ni] nguvu ya Mungu	1 Kor. 1:24

1 Wakorintho 1:18 na 1 Wakorintho 1:24 zinaonesha kwamba Kristo ni nguvu ya Mungu, katika maana kwamba ana uwezo wa kuwaokoa watu kutoka katika dhambi zao. Kwa hakika, "Mungu alipenda kuwaokoa waaminio kwa upuzi wa lile neno linalohubiriwa" (1 Kor. 1:21). Virai "sisi tunaokolewa" (1 Kor. 1:18), "waaminio" (1 Kor. 1:21), na "waitwao" (1 Kor. 1:24) vinarejelea kundi lile lile, yaani, watu wanaouishi uzoefu wa wokovu kwa njia ya imani. "Injili ya Kristo ... ni uweza wa Mungu uleto wokovu kwa kila aminiye" (Rum. 1:16).

Kristo si nguvu tu bali pia hekima ya Mungu. Hii ina maana kwamba kupitia Kwake Mungu alikabili na kutatua tatizo la dhambi, tatizo ambalo hekima ya kibinadamu haikuwa na uwezo wa kulitua. Hekima ya ulimwengu huu haiwezi kuwafanya watu wamjue Mungu (1 Kor. 1:21). Kinyume chake, kwa njia ya Kristo tunakuwa wenye hekima hata kupata wokovu (2 Tim. 3:15).

SOMA

1 Wakorintho 1:24–29. Tazama maneno yaliyo hapo, kama vile "upuzi," "dhaifu," "nguvu" na "hekima." Anatoa hoja gani?

Katika kusoma 1 Wakorintho 1:24–29, mtu anapaswa pia kutambua maneno mpuzi (au upuuzi) na dhaifu (au udhaifu). Hoja ni kwamba hekima ya kibinadamu inaweza kuuchukulia neno la Msalaba kuwa ni upuuzi na udhaifu. Hata hivyo, "upumbavu wa Mungu una hekima zaidi ya wanadamu, na udhaifu wa Mungu una nguvu zaidi ya wanadamu" (1 Kor. 1:25). Hii haimaanishi kwamba Mungu ni dhaifu au mpumbavu, lakini ni usemi tu unaoonesha jinsi nguvu na hekima ya Mungu vinavyozidi sana kitu chochote cha kibinadamu.

Tafakari maneno "ya kwamba si wengi wenye hekima ya mwilini, si wengi wenye nguvu, si wengi wenye cheo walioitwa" (1 Kor. 1:26). Kuna ujumbe gani kwa ajili yetu?

JIFUNZE ZAIDI

Ellen G. White, "Kalvari," uk355-371, katika Tumaini la Vizazi Vyote, sehemu ya pili.

"Kwenye mioyo ya wengi wanaoishi sasa, msalaba wa Kalvari umezungukwa na kumbukumbu takatifu. Kumbukumbu takatifu zinaunganika na matukio ya kusulubishwa. Lakini katika nyakati za Paulo msalaba ulikuwa unachukuliwa kwa hisia za hofu na vitisho. Kumtangaza kama Mwokozi wa wanadamu aliyeuawa msalabani, kwa hali ya kawaida ingekuwa ni kuchochea dhahaka na upinzani.

"Paulo alikuwa anafahamu vyema namna ambavyo ujumbe wake ungepokelewa na Wayahudi na Wayunani wa Korintho kwa pamoja. . . . Miongoni mwa wasikilizaji wake waliokuwa Wayahudi, walikuwepo ambao wangeudhiwa na ujumbe alikuwa karibu kuuhubiri. Na katika vipimo vya Wayahudi maneno yake yangukuwa upuuzi."

"Lakini kwa Paulo, msalaba ulikuwa ni chombo kilichokuwa kimeuteka upendo wake. Tangu alipotekwa akiwa kwenye jukumu lake la kuwatesa wafuasi wa Mnazarayo, alikuwa hajaacha kujivunia msalaba. Wakati huo alipokuwa amepewa ufunuo wa upendo wa Mungu, kama ulivyodhihirishwa katika kifo cha Kristo; na kubadilishwa kulikokuwa kumefanyika katika maisha yake; na kuileta mipango na makusudio yake ya maisha katika upatanifu na mbingu. Tangia wakati huo, amekuwa mtu mpya katika Kristo. Kwa uzoefu wake binafsi, alikuwa ametambua kuwa mara hiyo mwenye dhambi anapokuwa ameatazama upendo wa Baba, unavyoonekana katika kafara na Mwanawe, na kujitoa katika mvuto wa kimbingu, badiliko la moyo huwa linatokea, na kuanzia hapo na kuendelea Kristo huwa ni yote katika yote."—Ellen G. White, *Matendo ya Mitume*, sehemu ya kwanza, uk. 211, 212.

MASWALI YA KUJADILI

1. Katika bustani ya Gethsemane, Yesu alisema, "Baba yangu, ikiwezekana, kikombe hiki kiniepuke" (*Mt. 26:39*). Ombi hili linasema nini kuhusu bei kubwa ambayo Yesu alilipa msalabani?
2. Paulo anasema, "Upumbavu wa Mungu una hekima zaidi ya wanadamu" (*1 Kor. 1:25*). Ni kwa njia zipi hekima ya Mungu ni tofauti sana na hekima ya kibinadamu?
3. Ujumbe wa Kristo aliyesulubiwa ulikuwa kikwazo kwa Wayahudi na upuuzi kwa Wayunani. Ni mada gani za Biblia tunazohubiri leo zinaweza kuleta matokeo yaleyale kwa wasomaji wa sasa na kwa nini?
4. Paulo anasema kwamba "mwanadamu wa tabia ya asili hayapokei mambo ya Roho wa Mungu" (*1 Kor. 2:14*). Kwa hiyo, tunawezaje kuzungumza habari za Yesu kwa watu hawa kwa namna ambayo inaweza kugusa mioyo yao? Au labda matendo yetu pekee ndiyo yatawafikia?